

Uponyaji Kutokana na Athari za Kizazi

Hali na Chanzo cha Dhambi ya Kizazi

Mojawapo ya njia ambazo Shetani hutunyanyasa ni kutumia athari za uovu kupitia kwa “milango” iliyo wazi katika ua linalotukinga. (rejelea Ayubu 1:10) kwa ajili ya dhambi zilizotendwa na babu zetu. Mungu anatwambia hayo katika vifungu kadhaa vya maandiko (Kut. 20:5 na 34:7, Hes. 14:18, Kumb. 5:9, Yer. 32:18).

Watu wachache sana wanaweza kupinga kuwepo kwa **urithi wa maumbili**—njia ya halisia ya kurithisha sehemu ya DNA inayorithisha tabia au umbile fulani kwa watoto wetu, ambayo huwafanya watoto wetu wawe na sifa za kimaumbile na hali ya wazazi wao na babu zao (kurejelea “mwili”). Pia, wachache wanaweza kupinga kuwepo kwa **kuelekeza kwa kurithisha** watoto matatizo ya kiakili ya wazazi wao (kwa mfano, huzuni, wasiwasi, dukudu-ku,— kurjelea “nafsi”). Vilevile, kuna **urithi wa kiroho** tunaopokea tukiwa tumboni mwa mama zetu (kurejelea “roho”). Tunalijuaje jambo hili?

Katikati ya kifungu cha tano cha Kutoka 20 (Amri kumi) tunapata maneno haya kutoka kwa Mungu: *“kwa kuwa mimi Mwenyezi-Mungu, Mungu wako, ni Mungu mwenye wivu. Nawapatiliza wana maovu ya baba zao, hata kizazi cha tatu na cha nne cha hao wanchukiao. Lakini nawafadhili maelfu ya wale wanipendao na kuzishika amri zangu.”* (Kut. 20:5-6). Mzizi wa dhambi ya asili ulianzishwa na Adamu na Hawa katika Bustani la Edeni. Ingawaje walitenda dhambi, baadaye walimfuata Mungu na kumtii. Adamu na Hawa waliwarithisha watoto wao—kupitia kwa **urithi wa kiroho**—dhambi ya kuasi na kuabudu sanamu na vilevile baraka za rehema (kif. 6).

Abeli aliamua kutii na hivyo basi akapokea rehema. Kaini aliamua kuasi na akatenda dhambi ya kuabudu sanamu na kuua. Kwa ajili ya kitendo hicho watoto wa kaini walilaaniwa hadi sasa. Kurithisha huku kwa baraka au laana (kulikoanza na Adamu na Hawa) kunaendelea mpaka sasa katika sheria ya kiroho ya urithi.

Kwa nini Mungu amelishikilia sana jambo hili? Hebu tuchunguze kwa makini Amri Kumi, kwanza kupitia kifungu ambacho amri hii iliandikwa, kinachofuata amri za kwanza tatu (zinazohusu dhambi ya kuabudu sanamu) Anza na kifungu cha 2: “Mimi ndimi Mwenyezi-Mungu, Mungu wako, niliyekutoa nchini Misri, ambako ulikuwa mtumwa” (Kut. 20:2). Katika kifungu hiki Mungu anawakumbusha Waisraeli kwamba wao ni wake. Aliwamba, aliwatoa Misri, aliteseka nao walipokuwa wakitoka Misri na kwa miaka 40 waliyozurura jangwani kwa sababu ya kuasi. Vifungu vifuatavyo vinasema:

- *“³Usiwe na miungu mingine ila mimi.”*
- *“⁴Usijifanyie sanamu ya miungu wa uwongo, au kinyago chochote kilicho mbinguni, katika nchi au majini chini ya ardhi.”*

- ⁵ *Usiisujudie wala kuitumikia: kwa kuwa mimi Mwenyezi-Mungu, Mungu wako, ni Mungu mwenye wivu. Nawapatiliza wana maovu ya baba zao, hata kizazi cha tatu na cha nne cha hao wanichukiao;*
- ⁶ *Lakini nawafadhili maelfu ya wale wanipendao na kuzishika amri zangu.*

Vifungu vitatu vya kwanza vilivyoonyeshwa hapo juu vinazungumza juu ya dhambi ya kuabudu sanamu. Si ajali kwamba vifungu hivyo vinatangulia katika orodha ya amri zote kumi.

Katika kitabu cha C. Peter Wager *“Hard Core Idolatry”*, anafafanua kwamba kuabudu sanamu ni “kuabudu, kutumikia, kuahidi, kutii, kufanya matendo ya kuinamisha kichwa, kutoa heshima kuu, kufanya ushirikiano na, kufanya agano na, kutafuta nguvu kutoka kwa au kwa njia yoyote ile kutukuza **kiumbe yeyote wa roho pasipo Mungu.**” Kwa hivyo, kuabudu sanamu kunahusu kuabudu vitu vya ulimwengu usioonekana (watawala wakuu wa kiroho, nguvu, n.k.), Kufanya hivyo humfanya mtu aweze kuvitambua kwa njia maalum (au kuabudu) vitu halisi katika ulimwengu unaoonekana (magari, nyumba, nguo, pamoja na sanamu, n.k.) kuabudu sanamu ni kukipa kitu kingine (kama vile kazi zetu, pesa zetu, watoto wetu) uangalifu, nafsi, na kipaumbele ambacho Mungu anastahili kupewa. Uaminifu wetu unatakiwa kumwendea Mungu kwanza (mpango yake, makusudi, sheria, n.k.) Katika maisha yetu tunatakiwa kwanza kumfuata Mungu na haki yake.

Ingawaje uzinzi wa kimwili ni mbaya katika mfumo wa maadili ya Mungu, **uzinzi wa kiroho** (ambao ni kuabudu sanamu) ni kitu cha kuchukiza mno. Mungu anachukia dhambi za kuabudu sanamu kuliko dhambi zengine zote. Yeye aling’anga’ana kwa uvumilivu na wana wa Israeli kwa miaka 2500 walipofanya dhambi za kuabudu sanamu. Watu waliokuwa wakiishi ulimwenguni walichagua “uovu.” Mungu akawaangamiza (isipokuwa Nuhu na familia yake) katika gharika.

Hata hivyo, Waisraeli hawakupata funzo kutokana na mambo yaliyofanyika hap awali. Musa alipotoka mlimani na amri za kwanza. (Amri Kumi), Waisraeli—wakiongozwa na Haruni—walipatikana wakiabudu sanamu ya ndama ya dhahabu, na watu 23, 000 walifanya dhambi za ngono na karamu ya ulafi, ulevi na uasherati (I Kor. 10:8).

Mtu anapotenda dhambi kwake binafsi au dhambi dhidi ya mwenzake, au anposhiriki katika aina yoyote ya ushetani, tukio hilo la dhambi hukita mizizi ndani ya roho yake, na kufungua mlango katika ua lake la kiroho. Mtu huyo asipotubu (kwa kuifuata mpango wa Mungu), dhambi hiyo huzama katika mawazo na mwenendo wake; dhambi hiyo huwa siri (ikiwezekana) na hurudiwa kwa njia rahisi. Mtu huyo huacha kumzingatia Mungu na mpango wake na kuanza kuizingatia dhambi hiyo, inayomwakilisha shetani na ufalme wake wa giza.

Hata kama ilitendeka vipi, mtu huyo amekiruhusu kitu kichukue nafasi ya kwanza katika moyo wake. Ameacha kuzifuata njia za Mungu moyoni mwake. Mtenda dhambi huyo huanza “kuifuata miungu mingine,” kama alivyofanya Hawa alipoamua kula tunda walilokatazwa. Mungu hukichukulia kitendo hicho kuwa ni kuabudu sanamu, na hivyo basi sheria ya urithi wa kiroho huanza kufanya kazi.

Dhambi hii ambayo mtu hajatubu hugeuka na kuwa laana ya kizazi, na waandishi wengi na waombezi hutumia tukio hilo kuifafanua **dhambi ya urithi**. Ili kuelewa zaidi vile uovu huu huendelea kutoka kizazi kimoja hadi kingine, soma (pamoja na somo la sehemu hii) sehemu inayoeleza juu ya “Uponyaji Kutokana na Laana.” Ningependa kusema hivi, tunaweza kupoteza

nguvu zetu kwa kujaribu kupata uponyaji ilhali kinachotuzuia kupata uponyaji wetu ni laana—mzizi wa dhambi ya kizazi uliopandwa miongo mingi iliyopita. Kufanya hivyo ni kama kujaribu kupigana na adui ilhali mikono yetu imefungiwa nyuma yetu. **Dhambi ya kizazi** huchochea angaa sheria nne za Mungu kama inavyoonyeshwa hapa chini.

1. **Sheria ya Mungu ya Baraka na Laana:** Kumbukumbu 28 inazungumza juu ya baraka na laana. Katika kumbukumbu 28:1-2, Mungu anasema kwamba wanoitii sauti ya Mungu na kuzingatia kwa uangalifu amri zake zote watapewa baraka zilizoordheshwa katika vif. 3-14. Lakini wasiotii sauti yake au kuzingatia sheria zake zote anaahidi kuwaletea laana zilizoordheshwa katika vif. 15-48 na 58-61. (Tazama pia Kumb. 27:15-26.)
2. **Sheria ya Mungu ya Kupanda na Kuvuna:** “*Alichopanda mtu ndicho atakachovuna.*” (Gal. 6:7). Babu zetu walipokumbana na hali ngumu, au walipopatwa na majaribu, shida, na vishawishi, wengine waliendelea kushirikiana na Mungu kwa njia ya karibu na kumgeukia ili awasaidie; walitubu dhambi zao, wakaomba baraka walipopata majaribu na shida, na kuomba ili wapate uponyaji kutokana na machungu na majeraha waliyopata. Walipanda “mbegu nzuri,” na wote katika vizazi vyao vya baadaye waliweza kuvuna upendo, furaha, na baraka kutokana na uamuzi bora waliofanya babu zao.

Lakini babu zetu wengine walitenda mambo kinyume na hayo walipopatwa na majaribu, shida na hali ngumu. Waliumizwa, wakajeruhiwa au wakadhulumiwa na kusumbuka, na hawakumgeukia Mungu awasaidie. Badala yake, walimwacha Mungu na wakakosa kusamehe, wakawa na hasira, wakakosa kutii n.k. Wengine walijaribu kutatua matatizo yao wenyewe. Wengine wakaendelea kuwa na hasira na chuki, na wakakosa kuyaona makusudi ya Mungu katika maisha yao. Walipowasamehe wengine, walipokea neema ya Mungu na wakasamehewa. Walipokosa kusamehe na kutubu, waliirejelea sheria ya Agano la Kale ya jicho-kwa-jicho.

Kutokana na milango hiyo iliyofunguliwa, roho waovu waliganda juu ya matendo hayo maovu na wakaweza kuingia katika vizazi vilivyofuata. Roho hao waovu walipanda mbegu za tamaa, kukataliwa, dhuluma, kumwabudu Shetani na kila aina ya uovu na **watu waliposhiriki katika matendo hayo**, vizazi vilivyofuata vilivuna laana za kihisia, kiroho na magonjwa ya kimwili, na vilevile kuvuna utengano wa watu na utengano wa jamii. Vizazi hivyo vya baadaye vilivuna laana na roho waovu (na kusababisha hali ya maisha isiyofaa kwa watu wenyewe na kwa familia zao za baadaye, ambazo mara nyingi zilijihusisha katika vitendo vya uchungu na vya kuzoea tabia mbaya ya kujamiiana kwa maharimu. Hali hiyo ya mambo huendelea kuwa mbaya zaidi kila kizazi kinapoendelea kukosa uponyaji. Si ajabu jamii inaendelea kuwa na hali mbaya katika afya ya (mwili, akili na roho) tunayoiona wakati huu!

Bila kujua kwamba shida zilizoko sasa za kihisia, kimwili na kiroho zilianzia katika vizazi vilivyotangulia (kutokana na tukio la kiwewe au dhambi mbaya ya kuhuzunisha) watu wengi sasa wanavuna mavuno ya huzuni, dukuduku, uwo-

ga, pamoja na shida mbalimbali. Wakristo wengi katika kizazi cha sasa hushangaa ni kwa nini (katika maisha yao ya kiroho) hawawezi kumsikia au kumwona Mungu, na pia hushangaa ni kwa nini wana kung'ang'ana kwingi.

3. **Sheria ya Mungu ya Kufunga na Kufungua:** *“Nitakupa funguo za ufalme wa mbinguni; kila utakachofunga duniani, kitafungwa pia mbinguni; kila utakachofungua duniani, kitafunguliwa pia mbinguni.”* (Mat. 16:19). Babu zetu walipotenda dhambi, walivifunga vizazi vyote vya baadaye kwa athari au matokeo ya dhambi hiyo. Yesu pekee ndiye anayeweza kufungua mikanda hiyo.

Wahusika wengine huwa wanajiuliza iwapo chanzo cha dhambi yao ya urithi kilikuweco kitambo kuliko vizazi vinne vilivyopita. Jambo hili huulizwa sana na Waafrika wa Marekani—ambao babu zao walikuwa watumwa, vilevile Wahindi wa asili ya Marekani au watu wanaotoka katika mataifa mengine kama vile (Japan na Ujerumani).

Watu wengine hudhani kwamba dhambi hiyo ikishapita vizazi “vinne” vilivyotajwa, watoto wanaozaliwa huwa wamewekwa huru kutokana na laana hiyo bila masharti, wakidhani kwamba laana hiyo hurudiwa tu kwa vizazi vinne halafu ikaisha. Hiyo si kweli. **Kwa kila kizazi kisichotubu, utaratibu wa kizazi cha kwanza huanza upya.** Laana hujirudiarudia mpaka toba ifanyike. Watoto wakishatubu, basi wao huwa katika kf. ⁶ *Lakini nawafadhili maelfu ya wale wanipendao na kuzishika amri zangu.”*

Kutoka 20:5 inatumia neno **maovu**. Kuna utata kuhusu tofauti iliyoko kati ya neno ‘dhambi’ na ‘uovu’. Hiyo ni rahisi kueleza, **dhambi ni chanzo na maovu ni matokeo**. Mzazi akitenda dhambi (kama vile kujihusisha katika ushetani/mizungu au dhambi ya ngono), hiyo huleta laana. Mzazi alitenda dhambi lakini laana hiyo husababisha maovu ya kizazi au udhaifu unaorithishwa kizazi cha mtu huyo. Mazoea mabaya ya kiafya, au kupata ugonjwa wa zinaa mtu akiwa mja mzito, kunaweza kusababisha ulemavu katika mwili wa mtoto. Dhambi ya kiroho husababisha ugonjwa wa kiroho mara moja ndani ya mtu aliyeitenda, nayo husababisha maovu ya ugonjwa wa kimwili/au ulemavu katika vizazi vitakavyofuata. Tusielewe vibaya, msamaha wa dhambi umetolewa kupitia kwa kifo cha Yesu msalabani. Hatuwajibiki kwa dhambi zilizotendwa na vizazi vilivyopita, lakini Mungu hakuahidi kwamba tutaepuka matokeo ya dhambi zao bila nguvu za kiungu kuingilia kati. Ukweli ni kwamba alisema, *“Nawapatiliza wana maovu ya baba zao, hata kizazi cha tatu na cha nne.”* (Kut. 20:5 na 34:7, Hes. 14:18, Kumb. 5:9).

4. **Sheria ya Mungu ya Kuzidisha:** *“Nyingine zilianguka penye udongo mzuri, zikaota, zikazaa; nyingine punje mia moja, nyingine punje sitini na nyingine thelatini.”* (Mat. 13:8). Chochote tupandacho kitazidi. Tukipanda mbegu ya tufaha, tutavuna mti mzi-ma uliojaa matufaha. Tukipanda (halafu mwaka uwe mzuri) kipimo kimoja cha mbegu za ngano, tutavuna vipimo 30 vya ngano.

Hebu fikiria juu ya mifano hii ya kisasa inayoonyesha vile sheria hii inafanya kazi.

Uchunguzi ulifanywa na Idara ya Ustawi ya Jimbo la New York kumhusu Mag (mwanamke aliyeishi katika miaka ya 1900), mhamiaji wa Amerika ambaye aligeuka na kuwa kahaba. Katika kipindi cha miaka 70 walipata watu 1200 waliotoka katika uzao wa Mag na wakagundua mambo yafuatayo: 280 walikuwa maskini waliopata msaada kutoka kwa taifa, 148 walikuwa wahalifu waliofungwa jela. Jimbo hilo liligharimika (kwa kutumia kiasi cha kubadilisha fedha cha mwaka wa 1903) \$1,308,000.

Uchunguzi ulifanywa miongoni mwa watu 1 200 wa uzao wa familia ya Jukes. Max alikuwa mkanaMungu aliyemwoa mwanamke asiyemjua Mungu na wakawa na watu wa uzao wao 560: 310, walikufa wakiwa maskini, 150 walikuwa wahalifu, 7 walikuwa wauaji, na 100 walikuwa walevi. Zaidi ya nusu ya wanawake hao walikuwa makahaba. Gharama kwa serikali ilikuwa \$ milioni 1.5 kwa kutumia kiasi cha kubadilisha fedha cha karne ya 19.

Jonathan Edwards aliishi wakati wa Max Jukes. Alikuwa Mkristo aliyemwoa mwanamke mcha Mungu. Kati ya watu 1,394 wa uzao wake, 295 walihitimu na shahada ya chuo, 13 wakawa maraisi wa vyuo na 65 wakawa Maprofesa. Watatu walichaguliwa katika bunge ya Amerika. Watatu wakachaguliwa kuwa magavana wa jimbo, na wengine walikuwa mawaziri katika nchi za kigeni. Thelatini walikuwa mahakimu, 100 walikuwa mawakili, na mmoja alikuwa mkuu wa kitivo katika Chuo kimoja cha Utabibu, sabini na watano wakawa maofisa wa jeshi la nchi kavu na la maji, Mia moja walikuwa wamishonari waliojulikana sana, wahubiri na waandishi. 80 walikuwa na vyeo katika ofisi za umma. Mmoja wao alikuwa Mdhhibiti Fedha wa Hazina ya Marekani na mwingine akawa Makamu wa Raisi wa Marekani. Hayo yote hayakuigharimu serikali chochote.

Fikiria juu ya Andrew Murray aliyekuwa mmishonari wa Afrika kusini. Alikuwa na watoto 11: 5 wakawa wahuduma, 4 wakawa wake wa wahuduma, wajukuu 10 wakawa wahuduma, na wajukuu 13 wakawa wamishonari katika nchi za kigeni.

Uchunguzi uliofanywa na Dk. D. H. Scott ulionyesha kwamba kulikuwa na hatari ya 237% ya kumpata mtoto aliye na kasoro za kimwili na kihisia iwapo mama ya mtoto huyo yuko katika uhusiano ulio na matatizo au katika ndoa yenye matatizo wakati wa mimba ya mtoto huyo.

Kasisi Marshall Lowell—kuhani wa kanisa la Episkopo—alitoka katika familia iliyokuwa na mpangilio wa mtoto mmoja wa kiume katika kila kizazi kufa. Katika umri fulani mmoja alikufa akiwa na umri wa miaka 65, aliyefuata akafa tena na umri wa miaka 42, hali hiyo ikaendelea hivyo. Alimwomba Mungu ili avunje laana hiyo na akaendelea kuishi.

Uchunguzi uliofanywa mwaka wa 1978 katika Chuo Kikuu cha Loyola ulionyesha kwamba wagonjwa kadhaa walijaribu kujiua katika tarehe fulani ya kila mwaka. Iligunduliwa kwamba tarehe hizo zilikuwa tarehe zilezile ambazo mama zao walijaribu kutoa mimba watu hao walipokuwa tumboni. Pia mbinu walizotumia kujaribu kujiua zilifanana na zile ambazo mama zao walitumia kujaribu kuzitoa mimba hizo.

Molly—mwanamke wa miaka 30 mwenye afya nzuri na mwenye akili nyingi alipatwa na kitu alichokieleza kuwa hofu kuu ya kuaibisha, woga wa kusafiri mahali popote karibu na maji. Iligunduliwa kwamba mjomba yake aliyezama wakati wa mkosi wa Titanic “hukabidhiwa kwa Bwana . Hakukuwa na nafasi ya ufungaji (kama inavyofanyika katika maziishi). Ufungaji ulipofanyika, woga huo uliondoka kabisa.

Margaret alikuwa na umri wa miaka 73 alipoanza “kushambuliwa” na—milipuko mikali ya kukasirika na ugomvi usiosababishwa na chochote. Mama yake (aliyekuwa amefariki miaka minne iliyopita akiwa na umri wa miaka 96) alikuwa na tabia kama hiyo. Zaidi ya hayo, iligunduliwa kwamba katika vizazi sita vilivyopita, mtoto wa kwanza wa kike alikuwa ameonyesha tabia kama hizo za kutatiza. Iligunduliwa kwamba tabia hiyo ilikuwa imeanza karibu miaka 150 iliyotangulia, mtu mmoja wa familia hiyo alipojiua. Baada ya kitendo hicho, katika mkondo wa familia hiyo, mtoto wa kwanza wa kike aligeuka na kuwa mlevi sugu, na kuwa na tabia sawa na zile zilizoelzwa hapo juu. Margaret alipata uponyaji wake kupitia kwa maombi.

Mwalimu mmoja alikuwa akipata jinamizi mara kwa mara. Katika kila jinamizi alijiona akiwa amesimama kando ya “lindi kubwa jeusi.” Iligunduliwa kwamba, alipokuwa na umri wa miaka miwili, baba yake alifia juu ya nyambizi, iliyozama wakati wa vita. Baada ya kuombewa, jinamizi hizo hazikuonekana tena.

Alletah Nagako—mwanamke wa Kiafrika wa umri wa miaka 33—alikuwa na “pembe” ya urefu wa inchi 1.5 iliyokuwa imeota juu ya kichwa chake kwa kipindi cha miaka minne iliyopita. Aligundua kwamba baba ya baba ya babu yake alikuwa mchawi naye pia alikuwa na pembe juu ya kichwa chake.

Mwandishi mmoja anayeitwa Noel Gibson amegundua kitu anachokiita **ulevi sugu wa urithi**, unaoweza kusababisha aina sita za kutawaliwa na ubaya kujidhihirisha bila mtu anayetawaliwa na ubaya huo kuwa na hamu yoyote ya pombe. kutawaliwa na ubaya kunaweza kukiruka kizazi kimoja kabla ya kurudia tena kuwatawala watu. Aina nyingine ya kutawaliwa na ubaya ni: madawa ya kulevya, nikotini, kamari, mazoezi ya kupita kiasi, chakula na kufuja pesa (Kitabu kiitwacho “*Freedom in Christ*,” ukurasa wa 233).

Fikiria Juu ya Uchunguzi Huu wa Nyakati Hizi

1. Watoto waliokuwa na nyanya waliovuta sigara wana uwezo mara mbili wa kutawaliwa na ubaya huo, hata kama mama zao hawakuvuta sigara.
2. Watoto wana uwezo mara mbili wa kufanya uzinzi katika ndoa zao ikiwa mama au baba zao walifanya uzinzi, hata kama hawakujua kitendo cha wazazi wao cha kutokuwa waaminifu.
3. Watoto wa wazazi waliotengana wana kiasi mara kumi, cha kujiua.
4. Watoto wa kike kutoka katika ndoa zilizovunjika wana kiasi mara 5 cha kuvunja ndoa kuliko kiwango wastani cha nchi.
5. Watoto wa kiume kutoka katika ndoa zilizovunjika wana kiasi mara 3 cha kuvunja ndoa kuliko kiwango cha wastani cha nchi.
6. Watoto wa walevi sugu wana uwezo mara 3-5 wa kuwa walevi sugu, homoni zao ni tofauti na zile za watoto waliozaliwa na wazazi wasio walevi. Wanaweza kunywa pombe nyingi bila kulewa.
7. Kuna hatari ya 237% ya kumpata mtoto aliye na kasoro za kimwili na kihisia iwapo mama ya mtoto huyo yuko katika uhusiano ulio na matatizo au katika ndoa yenye matatizo wakati wa mimba ya mtoto huyo.
8. 80% ya watu walio katika jela au wale ambao ni makahaba walidhulumiwa kimapenzi walipokuwa watoto.
9. 22% ya watoto wote hudhulumiwa kimapenzi.

Mifano ya Dhambi za Kizazi Katika Biblia

1. Abrahamu aliwadanganya wafalme wawili kwamba Sara alikuwa “dada” yake. Baadaye Rabeka (mtoto wa ndugu ya Abrahamu na mamake Yakobo) walipanga njama na mwanawe (Yakobo) kumdanganya Isaka, babake Yakobo. Imeandikwa kwamba alikufa bila kuwapata watoto wengine; utasa ulikuwa laana ya aibu katika Israeli (Mwa. 27).
2. Kwa vile watu wawili wa familia ya Musa walitenda dhambi kwa kunung’unika dhidi yake, familia za Kora, Dathani na Abramam zilikufa pamoja na watu wengine 250 (Hes. 16:35).
3. Watoto wa Akani walikufa na baba yao kwa sababu ya dhambi yake (Yosh. 7:1-26).
4. Eli alipokosa kuwarekebisha watoto wake waliokuwa na utovu wa heshima, alisababisha laana kuwekwa juu ya vizazi vyake vya baadaye (I Sam. 3:13-14 na 2:32-33).
5. Gadhabu ya Mungu ilimjia mkuu wa watu wa Yuda vizazi viwili baada ya Manase, ingawaje Manase alitubu na Yosia akawa mfalme mwenye haki kuliko wote (2 Fal. 23:26-27).
6. Yeroboamu alipoabudu sanamu laana ili wajia watoto wake na taifa lake ((1 Fal. 14:9-11).
7. Daudi alikubali kwamba, *“Mimi ni mkosefu tangu kuzaliwa kwangu; mtenda dhambi tangu tumboni mwa mama yangu.”* Yeye alikuwa ni uzao wa Rahabu, aliyekuwa kahaaba (Mat. 1:5-6) naye aling’ang’ana na uzinzi na ndoa ya wake wengi. Mtoto wake aliyeitwa Amnoni alimtamani dadake na akafanya mapenzi naye. Sulemani, mwana wa Daudi alikuwa na wanawake 600 na mahawara (wengine wao walitoka Misri) nao walileta sanamu na miungu wa uwongo katika nchi ya Israeli.
8. Yoshua, alidanganywa akafanya agano na watu wa Gibeoni (Yosh. 9:7) miaka 430 baadaye Daudi aliomba na kumuuliza Mungu kwa nini kulikuwa na njaa, Mungu akamwambia Daudi kwamba ni kwa sababu Sauli alikuwa ameivunja agano hiyo kwa kuwaua watu wengi wa Gibeoni (2 Sam. 21:1-6). Daudi alikubali dhambi ya Sauli na watu wa Gibeoni wakawataka watoto saba wa Sauli wanyongwe ili kulipia makosa hayo ndiposa njaa ikome.
9. Yesu alipokuwa akisulubiwa, umati ulisema, *“Damu yake na iwe juu yetu na juu ya watoto wetu!”* (Mat. 27:25). Wayahudi wameteseka sana tangu wakati huo.
10. Yesu aliwaambia wakuu wa sheria, *“Matokeo yake ni kwamba kizazi hiki kitaadhibiwa kwa sababu ya damu ya manabii wote iliyomwagika tangu mwanzo wa ulimwengu.”* (Luka 11:50).

Dhambi inaweza kusafiri kupitia kwa vizazi katika makundi ya kidini au ya kisiasa, na pia kupitia kwa familia (Mat. 23:29-36). Katika kifungu cha 31 tunapata kwamba *“... nyinyi ni watoto wa watu waliowaua manabii,”* na katika kifungu cha 35, *“Hivyo lawama yote itawapateni kwa ajili ya damu yote ya watu wema iliyomwagwa juu ya ardhi. Naam, tangu kumwagwa damu ya Abeli ambaye hakuwa na hatia, mpaka ile ya Zakaria, mwana wa Barakia, ambaye mlimuua hekaluni kati ya patakatifu na madhabahu, na katika kifungu cha 36, “Nawaambieni kweli, kizazi hiki kitapata adhabu kwa sababu ya mambo hayo.”*

Maandiko Mengine Yanayoshughulikia Hali ya Urithi na/au Hukumu ya Dhambi za babu ni:

Lawi. 26:39-40	Hes. 14:18	1 Fal. 22:52	2 Fal. 5:27
2 Fal. 23:26-27	Neh. 9:2	Zab. 106:6	Yer. 2:9
Yer. 3:25	Yer. 14:7 and 20	Omb. 5:7	Dan. 9:1-20
Mik. 7:6	Mat. 27:25	Luka 19:42-44	Luka 11:47-52
Luka 23:28	Yoh 5:25	Yoh 9:2	1 Pet. 3:19
1 Pet 4:6			

Ombi la Uponyaji Kutokana na Dhambi Iliyorithiwa

Habari Njema

Habari Njema ni kwamba mtu aliye katika kizazi cha sasa akimgeukia Yesu amsaidie, upendo wake wa kuponya na kusamehe unaweza kutiririka hadi kwa vizazi vilivyopita na kukiponya chanzo cha tatizo hilo, na kuyafanya “maovu” hayo yakose kuwa na madhara yoyote. Anaweza ku-tuweka huru kutokana na utumwa wetu wa zamani na kuyageuza matokeo ya mbegu iliyopandwa.

Mhusika akimgeukia Mungu na kumwomba amponye kutokana na tatizo alilionalo, Mungu huleta nguvu na nuru yake, uzima wake na msamaha katika kila sehemu ya mkondo wa familia hiyo inayoumia. Matukio ya uchungu ya siku zilizopita hukakwa, na kuruhusu uponyaji na afya njema kufurahiwa na watu wa familia ya sasa. *“Kristo alitukomboza kutoka katika laana ya sheria kwa kujitwalia laana hiyo kwa ajili yetu; maana Maandiko yanasema: “Yeyote aliyetundikwa msalabani amelaa-niwa.” Jambo hili lilifanyika kusudi ile baraka aliyopewa Abrahamu iwashukie watu wa mataifa mengine kwa njia ya Kristo, na ili kwa imani, tumpokee yule Roho ambaye Mungu alituahidi.”* (Gal. 3:13-14). Yesu alizifia laana zilizolimbikiziwa watoto wetu.

Hatuwezi kueleza kabisa vile uponyaji wa athari za kizazi hufanyika lakini ni sawa na maelezo ya vile kifo cha Yesu msalabani kililipia dhambi zetu, na pia hatuwezi kueleza kwa nini kukiri na kutubu huondoa silaha ambazo Shetani anaweza kutumia dhidi yetu, wala hatuwezi kueleza kwa nini kufunga kula kuna faida kubwa. Hizi ni siri ambazo tumepewa kupitia kwa neema ya Mungu.

Tunajua kwamba **mbinguni hakuna wakati. Mungu anaweza kulifikia tukio lolote wakati wowote katika maisha ya mtu fulani ya kizazi kilichopita—ili alete uponyaji, kama anavyofanya kwa watu wa kizazi cha sasa** kupitia kwa uponyaji wa ndani. **Yeye haibadilishi hali hiyo bali huleta mabadiliko tunapoitikia**, ili auwezeshe upendo, neema, rehema na uponyaji utiririke katika hali hiyo.

Maombi ya Kibiblia ya Kumweka Mtu Huru Kutokana na Dhambi ya Kizazi

Uwezo (katika maisha yetu wenyewe) wa kutambua na kutubu dhambi za babu zetu ni wazo geni kwa Wakristo wengi. Sembuse kuomba (tukitubu) kwa ajili ya dhambi za watu waliokufa kitambo—jambo linalohitajika ili tuweze kupona? Kuziombea dhambi za watu waliokufa kunajulikana ka-

ma **toba ya kujihusisha**—kuomba na kutubu kwa niaba ya babu zetu ili tuweze kujiweka huru. Fikiria juu ya mifano hii katika maandiko:

1. Ezra na Waisraeli waliomba msamaha kwa ajili ya dhambi za babu zao (Neh. 1:6 na 9:5-15).
2. Daudi aliomba na kumwambia Mungu asikumbuke maovu ya zamani (Zab. 79:8).
3. Daudi aliomba na kuungama dhambi za babu zake (Zab. 106:6).
4. Daudi alitubu kwa ajili ya dhambi za Sauli alipowaua watu wa Gibeoni (2 Sam. 21:1-5).
5. Yeremia alikubali uovu wa babu za Israeli (Yer. 3:25, 14:7 na 20, na 32:18).
6. Danieli aliungama dhambi zake na dhambi za wafalme wa watu wake (Dan. 9:1-20).
7. Nehemia aliziomba dhambi za Israeli (Neh. 1:4-11 na 9:1-4).

Kuombea Uponyaji wa dhambi za urithi kunahitaji hatua tatu:

- Kwanza, ni lazima tutambue dhambi na laana hizo.
- Pili, ni lazima tuombe maombi ya **toba ya kujihusisha** na kumwomba Mungu awasamehe watu waliotenda dhambi hiyo ya kwanza.
- Tatu, ni lazima tuombe na kumwambia Mungu atuweke huru kutokana na laana hizo za kizazi ili tuweze kuwekwa huru.

Kutambua Dhambi na Maovu ya Kizazi

Kuna njia mbili za kutambua dhambi na maovu ya kizazi yanayoathiri maisha yako ya kutembea na Mungu. Njia moja ni ya kumwambia mtu aliye na kipawa cha utambuzi wa mapepo na aliye na uzoefu katika uwanja huu akuombe. Mara nyingi waombezi hao waweza kutambua majina ya dhambi hizo na vizazi vilivyotenda dhambi hizo. Kwa hali yoyote, waombezi walio na vipawa na uzoefu huo ni wachache sana. Hata kama wako, matumizi ya jedwali la ukoo yatawasaidia sana.

Ikiwa watu walio na vipawa hivyo hawako, kutumia jedwali la ukoo na kuzifuata hatua zifuatazo kunaweza kukusaidia kutambua dhambi za kizazi za babu zako. Wakati mwingine utaweza kupata dokezo kuhusu aina ya dhambi hiyo kupitia kwa ishara za dhambi hizo katika maisha yako (kwa mfano, kukataliwa, tamaa, uzinzi, kukosa kujienzi, kutazama picha za kutia ashki, kukosa kiasi, n.k.) Ili kutambua dhambi za kizazi, fuata hatua hizi.

1. Lifuata jedwali la ukoo lililo mwisho wa sehemu hii, weka majina ya babu zako mahali ulipoonyeshwa. Kadiri unavyoweza kuyakumbuka. Ikihitajika pata usaidizi kutoa kwa babu zako walio hai.
2. Tumia orodha iliyo hapa chini ili utambue babu ambao walihusika katika mkondo wa tabia hiyo, kama ilivyoonyeshwa. Andika dhambi zao katika jedwali ya ukoo kando ya majina yao. Matatizo mengine yanaonekana wazi lakini mengine yanajulikana kwa Mungu pekee na yanaweza kutambuliwa tu kwa usaidizi wa Roho Mtakatifu. Usijali

- kuhusu kitu usichokijua. Yesu atakufunulia unachotakiwa kujua, na akikufunulia kitu ataleta uponyaji katika hali hiyo.
3. Tafuta mkono unaojitokeza katika ukoo wa kizazi hicho. Wakati mwingine laana hiyo humwathiri tu babu mmoja pekee katika kizazi fulani—wakati mwingine huathiri babu wote. Wakati mwingine laana hiyo hukiruka kizazi kimoja au zaidi kisha ikarudi baadaye. Matatizo mengine huwafuata watu kutoka juu hadi chini (kutoka kwa babu hadi kwa baba) ilhali mengine huja kutokea upande mmoja hadi mwingine (kutoka kwa shangazi hadi kwa shangazi au kutoka kwa binamu hadi kwa binamu).
 4. Tumia masomo ya sehemu za awali katika somo hili ili uweze kuondoa—kwa kutambua, kutubu, na kusamehe—dhambi zote zinazojulikana katika maisha yako.
 5. Ikiwezekana, pata usaidizi kutoka kwa mwombezi aliye na uzoefu wa kuombea athari za kizazi. Iwapo mtu huyo hawezi kupatikana, wasilisha orodha hiyo wakati wa Meza ya Bwana.

Orodha ya Uchunguzi #1—Tambua tatizo lolote la kiroho lililotokea kati ya matatizo yafuatayo:

1. **Shughuli za mizungu/ushetani:** rejelea orodha inayohusu mada hii katika sehemu inayoeleza juu ya “Uponyaji Kutokana na Mizungu/ushetani”
2. **Kifo kisicho cha kawaida, cha fujo au cha ghafla:** majonzi ya ghafla ambayo hayajatatuliwa, mauaji, jaribio la kujiua, kujinyonga, au mkondo katika ukoo wa mwanamume wa kufa wakiwa na umri mdogo.
3. **Vifo visivyo na mazishi:** watu waliokufa lakini wakakosa kufanyiwa mazishi vizuri au (waliokosa kukabidhiwa) kwa Bwana, waliokufa vitani, waliopotelea majini, mimba zilizotolewa, mimba zilizoharibika, n.k. vilevile waliofia katika taasisi za magonjwa ya akili, nyumba ya kuwaguzia watu, au katika jela; watu ambao hawakufanyiwa mazishi ya Kikristo, pamoja na kufanyiwa ibada ya ukumbusho au maombi, au wale ambao (kwa sababu zozote zile) walizikwa lakini watu hawakuomboleza.
4. **Dhambi za Ngoni:**
 - Uzinzi
 - Ukahaba
 - Usenge/ubasha
 - Kujamiiana kwa maharimu
 - Picha za kutia ashiki
 - Upotofu wa kingono, kama vile uhayawani wa kuingilia mnyama
 - Ngoni ya ovyo ovyo,
 - Tamaa ya ngoni
 - Kutawaliwa na ubaya kingono
 - Mazoea yasiyo ya kawaida yanayohusu utumwa, uchungu, n.k..
5. **Dhuluma:** ya kimapenzi, ya maneno, au ya hisia.

6. **Mwenendo wa kutawaliwa na ubaya:** mazoezi ya kupita kiasi, kutawaliwa na kazi au ufujaji wa pesa, madawa ya kulevya, chakula, kamari, ngono, pombe, kutawaliwa na nikotini, n.k.
7. **Dhambi za kurudiwarudiwa:** uwongo, udanganyifu, wizi, masengenyo, kukosoa, n.k.
8. **Kutawaliwa na utumwa wa nafsi:** mtu aliye kufa ambaye ulikuwa ukimtegemea alipokuwa hai (kwa mfano, mzazi mmoja aliyekuwa wa kutawala na mwingine aliyekuwa mtiifu)
9. **Mikondo miharibifu au isiyo ya kawaida katika uhusiano:** talaka, kuachwa, mtu anayevutiwa na watu walio na shida au matatizo.
10. **Historia ya kiwewe katika familia:** mauaji ya kinyama, baa, utumwa, kutekwa nyara, masuala ya asili ya kabila (yanayohusiana na historia ya kabila lao)
11. **Historia ya kidini:** dini zisizo za Kiyahudi au za Kikristo, hasa dini za Mashariki
12. **Uchungu aliopata mtu akiwa tumboni:** Uchunguzi umeonyesha kwamba watoto wanaweza kukumbuka mambo yaliyorekodiwa ndani ya akili iliyofichika tangu mimba hiyo ilipotungwa (wengi wanaweza kukumbuka hadi wakati ambao mimba hiyo ilikuwa na miezi minne) Kuna mifano ifuatayo:
 - Mtoto aliyetungwa mimba kutokana na tamaa au ubakaji
 - Mimba nje ya ndoa
 - Mzazi aliyefikiria juu ya kumtoa mtoto wake awe wa kupangwa au kumwacha mtoto wake
 - Mama ambaye mimba yake iliharibika au aliyetoa mimba kabla ya mhusika anayetaka uponyaji kutungwa tumboni mwa mama huyo.
 - Woga/wasiwasi (mama alikuwa na ugumu wa kubeba mimba hiyo mpaka wakati wa kuzaliwa mtoto)
13. **Tukio la kiwewe na/au kukataliwa utotoni kwa njia zifuatazo:**
 - Hisia kinzani au kukataliwa na mzazi mmoja
 - Kumpoteza mama au baba
 - Mama au baba kupatwa na ugonjwa wa kuhatarisha maisha.
 - Mtoto kupata ugonjwa wa kuhatarisha maisha
 - Baba au mama kuiacha familia
 - Mtoto aliyepangwa au aliyetumwa kuishi na jamaa zake wengine
 - Woga usio wa kawaida wa mzazi au wa jamaa wengine
14. **Kukataliwa na kukosa kujithamini:** Njia za kawaida ambazo mizizi ya dhambi za zamani za kizazi inaweza kuonekana ni kwa njia ya **kukataliwa, kujikataa mwenyewe, kuogopa kukataliwa, kukosa kujithamini** na **huzuni**—vitu hivyo vyote vina sifa nyingi zinazofanana (pia rejenea sehemu inayoeleza juu ya “Uponyaji Kutokana na Kukataliwa”):

—nafsi ya mtu ya kujitenga	—kujitahidi kuwafurahisa wengine
—maumivu makubwa moyoni	—kuwa na sura ya kinafiki
—kutamani upendo	—kuwa na shaka, kujidunisha
—hisia za kutokuwa na thamani	—kujichukia
—hisia za kuachwa	—kujilaumu

—kutokuwa na uhusiano wa kudumu —hakubali kupendwa au kupenda
 —majeraha na uchungu wa ndani —hajijui
 —hawezi kukubali upendo wa wengine
 —mwelekeo wa kutaka kukubaliwa na wengine —mwelekeo wa kufanya
 kwa kuwa mzuri au kwa kujitahidi sana mapenzi kwa njia ovyo

Orodha ya Uchunguzi #2—Tambua mambo unayofikiria kuwa ni “mikondo ya dhambi” katika ukoo wa familia yenu (ongeza mengine kila unapoyatambua):

hamaki	wivu	kuwa na kinyongo	ulafi
kutosamehe	kulipiza kisasi	kuwa na hasira	kiburi
kupenda mali	ukaidi	kuwa baridi katika upendo	

Orodha ya Uchunguzi #3—Tambua matatizo ya kiafya yanayojitokeza sana katika familia yenu (jisikie huru kuongeza mengine katika orodha hii):

saratani	ugonjwa wa sukari	duwaza
kuumwa kichwa	matatizo ya moyo	maradhi ya kiakili
kusahau	vidonda vya tumbo	matatizo ya ngozi
kuharibika akili	matatizo ya kupumua	magonjwa ya kiakili
matatizo ya kisaikolojia	shinikizo la damu	

Ombi la Uponyaji wa Dhambi na Moavu ya Kizazi

Dhambi na maovu ya kizazi ya Agano la Kale yanaonekana tena katika magonjwa ya wakati huu yasiyo na tiba. Habari Njema ni kwamba, kwa vile Yesu alichukua dhambi na maovu yetu, **tunaweza kuwekwa huru**. Ingawaje hiyo ni kweli, bado tunatakiwa **kujitwalia nguvu hizi za msalaba** wakati mwingine kwa njia maalum sana ili tuweze kupokea uhuru tunaotaka (Matendo 19:18-19, Waefeso 4:28) Kwa njia ya maombi mhusika anayetaka uponyaji anatakiwa kufanya mambo haya:

1. Kukubali imani yako kwa kile ambacho Kristo alikufanyia msalabani; mshukuru kwa baraka ya neema, msamaha wa dhambi, damu ya Yesu na mafuta ya Roho Mtakatifu.
2. Rudia tena nadhiri zako za ubatizo; mkubali Yesu awe Bwana na Mwokozi wako na umwambie aingie tana moyoni mwako. Ahidi kumfuata na kumtii kama Bwana wako.
3. Tubu dhambu zozote za kuabudu sanamu (unazozijua na usizozijua).
4. Mwambie Mungu akuonyesha mahali ambapo dhambi ya kwanza (chanzo kikuu) ilianza. Mwambie akuwezeshe “kuliona” tukio hilo na watu waliohusika.
5. Ungama dhambi za babu zako: “Ninakiri dhambi za babu zangu, wazazi wangu na zangu mwenyewe za _____” (tubu kila dhambi ya kizazi).

6. Msamehe mtu wa kwanza kutenda dhambi hiyo (huenda hawakujua athari ya kitendo walichokuwa wakifanya—kama vile Yesu aliwaombea msamaha watu waliomtesa, alipokuwa msalabani (Luka 23:34).
7. Kwa niaba ya watu wote wa familia yako, msamehe mtu wa kwanza kutenda dhambi hiyo. “Ninaamua kumsamehe na kumwachilia huru _____ kwa dhambi na athari ya _____ (taja jina la dhambi), ndani ya maisha yangu na ndani ya maisha ya watu waliomtangulia.”
8. Mwambie Mungu akusamehe kwa “matunda” yoyote ya sasa au ya zamani ya dhambi hizi katika maisha yako mwenyewe au katika maisha ya watu wa familia yako ya karibu. “Ninakuomba Bwana unisamehe, kwa dhambi hizi—kwa kuziruhusu zinitawale na kwa laana zilizoletwa kwangu na kwa watu wa familia yangu.”
9. Mwombe Mungu kutenda dhambi huyo na umwombe Mungu amsamehe (kama alivyofanya Yesu—na anaendele kutufanyia). Iwapo Bwana ameweka akilini mwako picha ya watu waliotenda dhambi hiyo ya kwanza ya urithi, mwambie Yesu aingie ndani ya picha hiyo iliyo akilini mwako. Endelea kuomba mpaka uwaone watu hao wakimwendea Yesu kwa utiifu au mpaka sura yao igeuke kutoka kwa giza hadi kwa nuru au uwaone wakipiga magoti mbele ya Mungu na kuomba msamaha.
10. (Ikiwezekana) omba kwamba watu hao wataweza kumfahamu Bwana Yesu Kristo, wakiamua kufanya hivyo.
11. Iwapo kuna watu waliokufa katika familia yenu na hawakufanyiwa mazishi, omboleza kwa ajili yao, na umwombe Mungu awapokee, Kwa upendo wakabidhi kwa Mungu na umwambie awapokee. Waombe watu ambao wamekuwa na majonzi kwa ajili ya watu hao waliokufa ili waweze kufarijika kwa kujua kwamba wafu hao sasa wako na Bwana. Omba ili wao pia waweze kuwachilia huru watu hao waliokufa.
12. Omba maombi yaliyo katika sehemu inayoeleza juu ya, “Uponyaji Kutokana na Laana” ili uvunje laana zozote zilizokujia. Halafu mbariki mtu aliyesababisha laana hiyo.
13. Katika jina la Yesu, kanusha athari zozote za ushetani/mizungu.
14. Omba kwamba **msalaba wa Yesu** utawekwa katikati ya dhambi hiyo na watu wa familia yako (wa sasa na wa zamani) na kwamba dhambi hiyo itafunikwa kwa **damu ya Yesu**.
15. Omba kwamba mhusika anayetaka uponyaji pamoja na watu wote katika ukoo wa familia yake watawekwa huru kutokana na dhambi hiyo na maovu yanayotokana nayo.
16. Omba ili utumiwe kama chombo cha kupitishia upendo na nguvu za Mungu ili watu wote wa ukoo wa familia yako waweze kuwekwa huru kutokana na utumwa, uchungu au dhambi yoyote.
17. Kwa niaba ya watu wote wa familia yako wanaoishi na waliokufa, tuma msamaha kwa watu wa vizazi vilivyopita.
18. Omba msamaha kwa njia yoyote ambayo tulianguka katika majaribu ya dhambi hiyo — kama vile vizazi vya zamani vilianguka katika majaribu.
19. Pitia maelezo juu ya **maagano ya damu** katika sehemu inayoeleza juu ya “Uponyaji Kutokana na Laana.” Mwombe Mungu na umwambie avunje kila viapo, viapo vya damu au laana za uchawi zilizowekwa juu ya maisha ya kila mtu katika vizazi vya ukoo wako.
20. Omba kwamba watoto wote wa watu wa familia yako wanaoishi sasa watawekwa huru pia.
21. Mshukuru Mungu kwa uponyaji huo.

Enda kwa athari ya kizazi inayofuata (mwenendo) ambayo Mungu anataka kuiponya. Utahitajika kurudia njia iliyoelezwa hapo juu. Kwa kila athari ya uovu. Huenda ikachukuwa muda mrefu lakini itakuwa ya manufaa sana.

Mwalimu wa Biblia Paul Cox amefaulu kuomba dhidi ya idadi yoyote ya dhambi za kizazi kwa kutumia Isaya 59—inayoeleza juu ya tando za buibui na mayai ya joka (yanayohusiana na udaku na kashfa) ya hukumu ya kukosoa, kijicho, mabishano, kushikilia makosa, lawama na wivu. Paulo na kikundi cha watu wengine wameunda ombi la **magonjwa yasiyopona ya kizazi na ya kiroho, kihisia na kimwili**, la kumweka mtu huru (kutokana na ukoo wa kizazi) la mambo yafuatayo: uwongo, kumkana Mungu, kunena lawama dhidi ya Mungu, kutunga na kunena uwongo moyoni, kunena dhuluma na uasi. Kwenda katika uchawi, machungu, ghadhabu, hasira, mizozo, na kashfa, pamoja na kila aina ya nia ya kuwadhuru wengine. Anasema ombi hilo ni la manufaa sana.

Nafasi haituruhusu kujadili Isaya 59 au ombi hilo (ambalo lina kurasa kadhaa). Lakini ikiwa ungependa nakala ya ombi hilo wasiliana na mwandishi wa kitabu hiki naye atafurahi kukutumia kwa njia ya barua pepe.

Ombi la Kuzivunja Laana za Kizazi za Mizungu/ushetani

Bwana,

Naja mbele yako leo nikitaka kusafishwa na kuwekwa huru kutokana na laana hizi za kizazi za kuabudu ngono, ndoto na tamaa, na laana zengine zozote za kizazi.

Ninakanusha uhusiano wote na athari ya kitu chochote cha ushetani/mizungu au cha Kishetani sasa na katika urithi wangu. Ninafuta madai yote ya Shetani dhidi yangu kulingana na Kumb. 7:26 na II Kor 6:14-15.

Ninatambua na kutubu kwa ajili ya babu zangu waliovunja Amri zifuatazo.

Kut. 20:3 Usiwe na miungu mingine ila mimi.

Kut. 20:4 Usijifanyie sanamu ya miungu wa uwongo, au kinyago chochote kilicho mbinguni, katika nchi au majini chini ya dunia.

Kut 20:5 Usiisujudie wala kuitumikia; kwa kuwa mimi Mwenyezi-Mungu, Mungu wako, ni Mungu mwenye wivu. Nawapatiliza wana maovu ya baba zao, hata kizazi cha tatu na cha nne cha hao wanchukiao;

Kut. 20:13 Usiue.

Kut. 20:14 Usizini.

Ninatambua kwamba kuabudu miungu wa uwongo katika kizazi cha urithi wangu ni kama gugu lili-lopandwa katika maisha yangu, linaloniunganisha na nguvu za kishetani zilizoachiliwa katika vizazi vya hapo awali na watu waliovunja ahadi hizo kimakusudi na wengine pia. Gugu hilo lina mizizi mirefu inayoenea mpaka kwa vizazi vijavyo na linawakilisha uovu na athari inayoendelea ya babu zangu walioabudu miungu wa uwongo. Ni kama uzinzi wa kiroho.

Ninaukata mzizi huu katika jina la Yesu kulingana na Mat 15:13 inayosema, *Kila mmea ambao Baba yangu aliye mbinguni hakupanda, utang'olewa.*

Katika jina la Yesu,, ninakuomba sasa uniweke huru kutokana na kila laana iliyo juu ya maisha yangu kulingana na Gal 3:13-14 inayosema. *“Kristo alitukomboa kutoka katika laana ya sheria kwa kujitwalia laana hiyo kwa ajili yetu; maana Maandiko yanasema: “Yeyote aliye-tundikwa msalabani amelaaniwa.” Jambo hili lilifanyika kusudi ile baraka aliyopewa Abrahamu iwashukie watu wa mataifa mengine kwa njia ya Kristo, na ili kwa imani, tumpokee yule Roho ambaye Mungu alituahidi.”*

Ninatubu kwa ajili ya dhambi ya uasi iliyofanywa na babu zangu kulingana na I Sam 15:23 *“ni kama dhambi ya uchawi.”* Hili ni dhihirisho la uasi wao dhidi ya Mungu, kutawala kwa hila, kuogofya, na kuamuru Wakristo wengine.

Bwana, kama vile Mwanao Yesu Kristo alitubu kwa niaba yangu alipomwaga damu msalabani na kufa, ninaomba msamaha na kutubu kwa niaba ya babu zangu wa zamani waliotenda dhambi hizi mbaya. Ninaomba kwamba kupitia kwa damu ya Yesu, athari yao juu ya maisha yangu itafutiliwa mbali. Ninawasamehe kwa yale waliyotenda, na kutumai kwamba siku moja kwa njia fulani wataweza kufahamu na kusadikishwa juu ya dhambi hizi na kukubali toba na msamaha kwao wenyewe.

Ninawabariki wote katika ukoo wa babu zangu waliosababisha laana kuja juu yangu kulingana na Luka 6:28 inayoniama: *“Watakieni baraka wale wanaowalaani, na waombeeni wale wanaowatendea vibaya.”*

Ninakiri imani yangu kwa Yesu Kristo na sadaka aliyotoa kwa niaba yangu kulingana na (Ebr. 3:1, Ebr. 11:6, Marko 9:23, Mat. 17:19-21).

(Rudia ombi hili mara tatu.)

Bwana Yesu Kristo, ninakiri kwamba nimetenda dhambi dhidi yako, na ninakuomba unisamehe kwa dhambi zangu zote. Ninaamini kwa moyo wangu wote kwamba wewe ni Mwana wa Mungu. Uliacha kiti chako cha enzi mbinguni ukawa mwanadamu. Uliishi katika ulimwengu huu na ukajaribiwa katika kila hali kama sisi, ilhali hukutenda dhambi. Halafu, ukaenda msalabani na ukayatoa maisha yako. Damu yako ya thamani ilimwagika ili niweze kukombolewa. Ulifufuka na ukaenda mbinguni. Utarudi tena katika utukufu wako wote. Ninakupa maisha yangu na ninakuomba uingie ndani ya moyo wangu kikamilifu, ili niweze kuishi na wewe milele. Katika jina la Yesu. Amina.

Katika jina la Yesu, ninakanusha kila aina ya kuabudu sanamu, vitu vyote vilivyotumiwa kuwakilisha miungu wa uwongo, na kazi zote za Shetani katika ibada ya kishetani.

Ninavunja mikataba yoyote ambayo babu zangu walifanya na Shetani kwa damu na kwa maneno. Ninakanusha na kuvunja wakfu wowote wa watoto katika mstari wa kizazi changu iliyofanywa kwa Shetani, iliyoniathiri mimi na kunizuia kumwabudu na kumtumikia Kristo nipendavyo.

Kwa jina la Baba, la Mwanao Yesu Kristo, na la Roho Mtakatifu, ninavunja kila muhuri wa kiroho unaonifunika, na kuzuia roho waovu na laana zozote kuvunjwa katika maisha yangu. Nimewekwa huru kwa upanga wa Roho Mtakatifu.

Ninakanusha matambiko ya kishetani ya kudhihaki kaida ya Ushirika Mtakatifu, ya kutoa sadaka ya wanyama na ya watu, ukiukaji wa kingono, ubakaji, uasherati, uzinzi, karamu ya uasherati, na kusaliti upendo na uaminifu.

Ninakanusha metendo yote ya dhuluma ya kihisia, kimwili, na kimapenzi yaliyofanyika wakati wa matambiko ya kishetani ya ukoo wa babu zangu, kudhihaki kwa sherehe za Kikristo, sherehe za kuwafanya watu wazae, zinazotokana na matambiko ya zamani ya kipagani, matambiko yote ya kutoa sadaka na sherehe zinazodhihaki kifo cha Yesu msalabani, ya misa giza au ushirika unaotumia vitu visivyotakatifu kama nembo na vitu visivyo takatifu au miili iliyo uchi hutumiwa katika vituo vya ibada.

Ninakanusha kule kudhihaki mateso na kusulubiwa kwa Yesu, kwa kuwachinja wanyama au wanaadamu wasio na hatia, matendo ya matambiko ya mauaji na mateso, ya desturi potofu za kingono, na matambiko ya dhuluma ya kimapenzi kutukuza tamaa na uharamishaji wa mwili wa binadamu na amri ya Yesu ya kuwapenda wengine.

Ninakanusha njia aliyotumia Shetani ya kupotosha akili za waathiriwa ili kumbukumbu yao ya sherehe na matukio ya dini inawafanya wawe na mawazo ya tamaa ya mwili.” Ninakanusha kila mawazo machafu na uwezo wa kubuni picha akilini na ninatamani niwe na mawazo mazuri kichwani mwangu.

Katika jina la Yesu Kristo, ninakanusha na kupinga roho ya **Kushikilia**, na roho ya **Amadeus** (tamaa). Ninakanusha na kukataa roho mwovu wa **Succubus** iliyoweza kusababisha mawazo machafu, ndoto, au uwezo wa kubuni picha akilini. Ninakanusha kila aina ya picha mbovu zilizonijia kwa kujihusisha na michezo kama vile “Majoka.”

Shetani, ninachukua nafasi yoyote ya kiroho ambayo huenda ulipewa na babu zangu au nami mwenyewe. Huna haki maishani mwangu wala mamlaka juu yangu. Mimi ni wa Mungu na nitamtumikia yeye pekee. Kwa mamlaka ya Bwana wangu Yesu Kristo, ninavunja nguvu ya kila laana iliyonishukia. Ninaamuru kila pepo wa laana aondoke maishani mwangu sasa. kila laana za Kizazi, pepo za laana ya uchawi, laana iliyorithiwa ya kuabudu uasherati, uwezo wa kubuni picha akilini, na tamaa ni lazima ziondoke sasa katika jina la Yesu Kristo. AMINA

Nguvu za Uponyaji za Ushirika Mtakatifu

Baada ya kufanya maombi ya kuvunja athari za kizazi, jedwali la ukoo lililokamilishwa linatakiwa kutolewa wakati wa sakramenti ya Ushirika Mtakatifu ambayo ni mojawapo ya njia muhimu ambazo Bwana hutupa uponyaji.

Kifo cha Yesu kilikuwa kitendo cha nguvu sana katika historia yote. Wakati huo, Shetani ali-shindwa kabisa. Kupitia kwa msalaba, tunajitwalia faida zote za kuteseka, kufa na kufufuka kwa Yesu—za kuponya majeraha yote ya babu.

Watu wanapokea nembo wakati wa Ushirika Mtakatifu, nguvu za kiungu za Bwana aliye-fufuka zitakuweco ili ziweze kuponya machungu na dhambi ambayo imeusumbua ukoo wa familia yenu, utumwa ambao umekuwa katika ukoo wa familia hiyo kwa karne nyingi—hatimaye huvunjwa. Dhambi husamehewa na watu wakawekwa huru kutokana na machungu yao, hisia na kumbukumbu. Tunaporudia kusema Sala ya Bwana kama sehemu ya sakramenti hiyo, sisi husema, “*Ufalme wako uje, mapenzi yako yafanyike duniani, kama huko mbinguni ... utuokoe na maovu,*” na kumwambia Mungu awaweke huru watu walio hai na waliokufa, kutokana na utumwa wa kuwa chini ya mwovu.

Katika Ushirika Mtakatifu, tunaomba kwamba kupitia kwa damu ya Yesu (inayowakilishwa kwa divai ya Ushirika Mtakatifu) Yesu Kristo atataka ukoo huo (wa watu walio hai na waliokufa) kutokana na mambo yote yanayoleta kizuizi katika maisha ya kimwili na ya kiroho, hasa kwa kuvunja kila vifungo vya urithi na laana, kwa kufukuza kila aina ya mapepo. (zingatia mapendekezo mengine yaliyo katika sehemu inayoeleza juu ya “Nguvu za Uponyaji za Ushirika Mtakatifu.”)

Mhusika anayetaka uponyaji anashauriwa kusoma vitabu katika orodha iliyo hapa chini, vilivyoandikwa na McAll na Smith vinavyohusu nguvu za sakramenti hii katika uponyaji wa athari za kizazi.

Vifaa

1. Kenneth McAll, *Healing the Family Tree* (Sheldon Press, London, 1982). ISBN 0-85969-532-8. (upigaji chap wa kitabu hiki umekoma.)
2. Kenneth McAll, *A Guide to Healing the Family Tree* (Queenship Pub., 1996). ISBN 1-882972-64-3.
3. Patricia Smith, *From Generation to Generation* (Jehova Rapha Press, PO Box 14780, Jacksonville, FL 33238-1470, 1996). ISBN 1-888871-24-5.
4. John Hampsch, *Healing Your Family Tree* (Our Sunday Visitor, Huntington, Indiana 46750, Library of Congress, 1989). ISBN 087973437X.
5. Noel and Phyl Gibson, *Evicting Demonic Intruders* (New Wine Press, 1993): 99-120. ISBN 1-874367-09-4.
6. Noel Gibson, *Freedom in Christ* (New Wine Press): 233. ISBN 1874367531.
7. <http://claretiaptapeministry.org/> (kuuponya ukoo wako)